

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. प्रधानमंत्री नरेंद्र मोदी होर न्यूजीलैंड दे अपने हमरूतबा क्रिस्टोफर लक्सन हुंदे कन्नै कल रायसीना डायलाग दा उद्घाटन करङन।
2. पाकिस्तान जेलम सिंघ च लश्कर-ए-तैयबा दा आतंकवादी अबू कतल मारेआ गेआ ऐ।
3. बलूचिस्तान च एफ.सी फौजियें गी लेई जा करदी बस पर कीती गेदी गोलीबारी च 12 पाकिस्तानी फौजी मारे गे, 26 घायल।
4. हफ्ते दे खीरै च आई दिएं छुट्टियें करियै श्री माता वैष्णो देवी दे मंदरै च भक्ते दी गिनतरी च मता बाद्दा दर्ज कीता गेआ ऐ।
5. जम्मू-कश्मीर पुलिस नै जम्मू मैराथन 2025 दा सरिस्ता कीता, 3000 शा बद्द लोकें एहदे च हिस्सा लैता।

<><><><><><>

<><><><><><>

PM-Raisina

प्रधानमंत्री नरेंद्र मोदी होर कल नमीं दिल्ली च न्यूजीलैंड दे प्रधानमंत्री क्रिस्टोफर लक्सन हुंदे कन्नै रायसीना डायलाग 2025 दा उद्घाटन करंगन। रायसीना डायलाग दा एहू दसमां संस्करण 19 मार्च तगर चलोग। इस आयोजन च शामिल देस मौजूदा भू-राजनीतिक ते भू आर्थिक सने नेकां महत्वै आहले मुद्दे पर गल्लकत्थ करदे न।

हर बरै इस बैठक च बक्ख-बक्ख देसें दे उच्ची सतह दे अधिकारी, नीतियां बनाने आहले, बन्ज बपार खेत्तर दियां बड्डियां हस्तियां ते पत्रकार शिरकत करियै वैश्विक स्थिति ते बक्ख-बक्ख समकालीन मुद्दे पर सहयोग दे मौके तलाशने पर गलल् करदे ना। इस सम्मेलन दा सरिस्ता अब्जर्बर रिसर्ज फाउंडेशन विदेश मंत्रालय कन्नै रलियै करा करदा ऐ। तोआई, न्यूजीलैंड दे प्रधानमंत्री क्रिस्टोफर लक्सन अज्ज दपैहरी भारत दे 5 दिनी दौरे लेई नमीं दिल्ली पुज्जे। उन्दे कन्नै इक्क उच्ची सतह आहला प्रतिनिधि मंडल बी शामिल ऐ जेदे च सीनियर अफसर, बपारी, मीडिया ते भारतीय समुदाय दे मिम्बर शामिल ना।

<><><><><><>

Abu Qatal Killed

पाकिस्तान दे झेलम सिंध इलाके च लश्कर-ए-तायबा गुट दा आतंकवादी अबू कतल जिसी कतल सिंधी दे नां कन्नै बी जानेआ जंदा हा, मारेआ गेआ। जंदी रातीं किश बेपंछानू हमलावरें अबू कतल दी गोली मारियै हत्या करी दित्ती। अबू कतल मोस्ट वांटेड आतंकियें चा इक हा जिन्ने जम्मू-कश्मीर च केई हमलें दी साजिश रची ही। ओहू आतंकी हाफिज सईद दा करीबी हा ते छदम PAFF ते TRF आतंकी गुट चलाने च इक टकोहदी भूमिका निभांदा हा।

<><><><><><>

Dy. CM Development Works

उपमुख्यमंत्री सुरिंद्र चौधरी होरें लोकें दी भलाई बेहतरी यकीनी बनाने लेई विकास परियोजनाएं दी रफ्तार गी बदाने लेई सरकार दी बचनबद्धता गी फी पक्का कीता। एहू गल्ल उनें अज्ज नौशहरा दा दौरा लांदे होई उत्थे जारी विकास परियोजनाएं दे कम्मे-काजें दा जायजा लेंदे होई आक्खी। दौरे दौरान उनें आश्रम, टाउन हॉल, शॉपिंग कम्प्लेक्स ते अस्पताल दी ईमारत दा दौरा कीता ते इनें कम्में गी समेंसिर पूरा करने पर जोर दित्ता। इस मौके उपमुख्यमंत्री होरें अधिकारियें ते मकामी लोकें कन्नै गल्लबात कीती ते ढांचागत कम्में-काजें बारै प्रतिक्रिया बी हासल कीती।

<><><><><><>

Poonch-Free Ration

माली तौरा पर कमजोर जरूरतमंद लोकें गी समर्थन देने दी इक्क कोश्ट च भारतीय सेना दी 39 राश्ट्रीय राइफल्स (RR) नै पुंछ जिले दे खनेत्तर च बसनीकें गी मुफ्त राशन ते होर दुआ खाने-पीने आहला समेयान उपलब्ध करोआया। इस पहल च भारतीय फौज आसेआ मकामी लोकें दी मदद करदे होई इस गल्ला गी यकीनी बनाना हा जे कोई बी जना भुक्खा नेई सोऐ। तकसीम कीती गेदी किटें च आटा, चावल, दाल, रूट्टी पकाने आहला तेल जेआ समेयान शामिल हा। लाभार्थियें चा इक जने नै सेना दी इस पहल दी सराहना करदे होई आखेआ।

<><><><><><>

CRPF-Medical Camp

सिविक एक्शन प्रोग्राम तैहत केंद्री रिजर्व पुलस बल दी 121 बटालियन नै अपने डिप्टी कमांडेंट राकेश कुमार हुंदी दिक्ख-रिक्ख च कठुआ जिले च लखनपुर इलाके दे ग्रांड जगतपुर च इक मुफ्त मेडिकल जांच कैंप दा सरिस्ता कीता गेआ। कैंप च सी.आर.पी.एफ ते जिला अस्पताल कठुआ थमां आए दे डाक्टरें दी टीम नै 400 शा बद्द मरीजें दी जांच कीती ते लोइचदियां दोआइयां मुफ्त दित्तियां। लोकें टकोहदा करियै बच्चें ते बुजुर्गें गी घरें कश गै लग्गे दे इस कैंप दा खासा साहू पुज्जा। इस मौके पर सी.आर.पी.एफ दी 121 बटालियन दे डिप्टी कमांडेंट राकेश कुमार होरें आखेआ।

<><><><><><>

Pak Army Attacked

पाकिस्तान दे बलूचिस्तान प्रांतै च नोशकी थाहर जरनैली शिड़क 40 पर रक्षणी मिल इलाके च एफ.सी फौजियें गी लेई जा करदी इक्क बस पर कीती गेदी भारी गोलीबारी च 12 सैनिक मारे गे ते 26 जखमी होई गेन। बलूच

लिब्रेशन आर्मी-बी.एल.ए नै सेना दे काफले पर कीते गेदे मारु हमले दी जिम्मेदारी लेती ऐ ते दावा कीता ऐ जे अजे तगगर घट्टघट्ट 90 जवान मारे गेन। पाकिस्तानी अधिकारियें बीएलए दे दावे दा कोई परता नेई दित्ता ऐ।

<><><><><><>

SMVD-Rush

त्रिकुटा दी पहाड़ियें पर स्थित श्री माता वैष्णो देवी दी पवित्र गुफा च मत्था टेकने लेई बड़ी मती गिनतरी च लोक मत्था टेकने आस्तै आवा'रदे न। मुल्ख भरै थमां श्रद्धालुएं दा एहू रश छुट्टियें कारण दिक्खने गी लब्भा'रदा ऐ जेदे कन्नै उत्थूं दा माहौल रौनकी होई गेआ ऐ। भारी रश दे बावजूद श्री माता वैष्णो देवी श्राइन बोर्ड नै श्रद्धालुएं दी जात्तरा सौक्खी ते बवस्थित बनाने लेई सब्बै बंदोबस्त कीते देन। श्रद्धालुएं बी कीते गेदे इंतजामें बारै संदोख प्रगट कीता ऐ। श्राइन बोर्ड दे अधिकारियें श्रद्धालुएं गी दिशा-निर्देश दी पालमा करने दे कन्नोकन्नी अधिकारियें कन्नै सहयोग करने दा आग्रह कीता ऐ। इस मौके पर आकाशवाणी समाचार दे संवाददाता कन्नै गल्ल करदे होई श्रद्धालुएं अपने विचार सांझे करदे होई आखेआ।

<><><><><><>

Prasar-Bharti-Award

हॉकी इंडिया दे 7में सालाना संस्करण पुरस्कारें च प्रसार भारती गी 2024 बरें च हॉकी दे प्रसारण ते एहूदे प्रचार-प्रसार सने बढावे च अनमुल्ले जोगदान लेई नमीं दिल्ली च जमन लाल शर्मा पुरस्कार कन्नै सम्मानित कीता गेआ। समारोह च हॉकी इंडिया नै 1975 च विश्व कप जित्ते आहले टीम मिम्बरे गी हॉकी इंडिया मेजर ध्यानचंद लाइफटाइम अचीवमेंट पुरस्कार कन्नै 50 लक्ख रुपें दे नकद ईनाम कन्नै सम्मानित कीता। टॉप दे पुरस्कारें च सविता पूनिया ते हरमनप्रीत सिंह गी महिला ते मर्दे दे वर्ग च 2024 बरे दे बेहतरीन खडारी लेई हॉकी इंडिया बलवीर सिंह होरें गी सीनियर पुरस्कार कन्नै सम्मानित कीता गेआ। जिल्ले के जंदे बरे अंतरराष्ट्रीय हॉकी थमां सन्यास लैने आहले पी.आर श्रीजेअ गी एफ.आई.एच मर्दे दे वर्ग च गोलकीपर ऑफ दा ईअर पुरस्कार प्रदान कीता गेआ।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किशत होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>

Jammu Marathon

जम्मू-कश्मीर पुलिस आसेआ अज्ज जम्मू च जम्मू मैराथन 2025 रन फॉर फन दा सरिस्ता कीता गेदा ह। अपने सिविक एक्शन कार्यक्रम तैहत आयोजित एह मैराथन जम्मू दे गुलशन ग्राउंड थमां शुरू होई जेदे च बक्ख-बक्ख वर्गें ते श्रेणियें च बक्ख-बक्ख उम्री दे कोई 3 जहार लोकें हिस्सा लैता। इन्दे च स्कूली बच्चे, बुजुर्ग, पुरुष, महिलां सब्बनें हिस्सा लैता। मैराथन दिएं श्रेणियें च 21 किलोमीटर दी हॉफ मैराथन द्रौड़ शामिल ही जेड़भू गुलशन ग्राउंड थमां शुरू होई। एहदे अलावा 10 किलोमीटर, 5 किलोमीटर, 4 किलोमीटर ते 2 किलोमीटर दियां द्रौड़ां बी शामिल हियां जिंदे च बक्ख-बक्ख उम्री दे लोकें हिस्सा लैता। 21 किलोमीटर हॉफ मैराथन पुरुष श्रेणी च फिरोजपुर पंजाब थमां मंजीत सिंह अब्बल थाहर पर आए जिस्सलै के 18 बरें कोला बद् उम्री दी 10 किलोमीटर द्रौड़ महिला श्रेणी च उत्तर प्रदेश दियां सविता पाल होरें पैहली थाहर अपने नां कीती। जागतें दी 18 बरें कोला घट्ट उम्री दी 10 किलोमीटर आहली द्रौड़ च चनैनी उधमपुर थमां प्रवीण कुमार होरें पैहली थाहर हासल कीती जिस्सलै के 10 किलोमीटर आहली जूनियर रोड रेस च 18 बरें कोला घट्ट उम्री दी कुड़ियें दी श्रेणी च सुलेखा अब्बल थाहर पर आई। इस मौके आकाशवाणी जम्मू कन्नै गल्ल करदे होई द्रौड़ें च हिस्सा लैने आहले इक प्रतिभागी नै आखेआ।

<><><><><><>